

U P U T S T V O

**o provođenju izbora za članove savjeta mjesnih zajednica na području općine Novo
Sarajevo**

Sarajevo, oktobar 2023. godine

Na osnovu člana 6. Odluke o raspisivanju izbora za članove savjeta mjesnih zajednica na području općine Novo Sarajevo („Službene novine Kantona Sarajevo“, broj 27/23 i 42/23), Općinska izborna komisija Novo Sarajevo na nastavku svoje 4. redovne sjednice, održanom 05.10.2023., donosi

UPUTSTVO

o provođenju izbora za članove savjeta mjesnih zajednica na području

Općine Novo Sarajevo

Član 1.

(Predmet)

Ovim Uputstvom definiše se postupak, organizacija i provođenje izbora za članove savjeta mjesnih zajednica na području Općine Novo Sarajevo, te način glasanja i brojanja glasačkih listića na biračkim mjestima za provođenje izbora za članove savjeta mjesnih zajednica.

Član 2.

(Datum održavanja izbora)

(1) Izbori za članove savjeta mjesnih zajednica se održavaju u nedjelju 19.11.2023. godine, osim ako Općinsko vijeće Općine Novo Sarajevo ne odluči drugačije.

(2) Biračka mjesta se otvaraju tačno u 07:00 sati, a zatvaraju tačno u 19:00 sati.

(3) Ako biračko mjesto nije otvoreno na vrijeme, a kašnjenje je trajalo do tri sata ili kraće, glasanje na tom biračkom mjestu može se produžiti za vremenski period u dužini trajanja kašnjenja. Ako je kašnjenje trajalo duže od tri sata, o dužini perioda za koji se glasanje produžava odlučuje Općinska izborna komisija Novo Sarajevo (dalje u tekstu: **Izborna komisija**).

Član 3.

(Broj članova Savjeta)

Broj članova Savjeta mjesnih zajednica koji se biraju na izborima je sljedeći:

Mjesna zajednica „Čengiće Vila I“	-----	7 članova
Mjesna zajednica „Čengiće Vila II“	-----	5 članova
Mjesna zajednica „Dolac“	-----	7 članova
Mjesna zajednica „Grbavica I“	-----	7 članova
Mjesna zajednica „Grbavica II“	-----	7 članova
Mjesna zajednica „Hrasno“	-----	5 članova
Mjesna zajednica „Hrasno brdo“	-----	7 članova

Mjesna zajednica „Kovačići“ -----	5 članova
Mjesna zajednica „Gornji Kovačići“ -----	5 članova
Mjesna zajednica „Kvadrant“ -----	5 članova
Mjesna zajednica „Malta“ -----	7 članova
Mjesna zajednica „Pofalići I“ -----	7 članova
Mjesna zajednica „Pofalići II“ -----	7 članova
Mjesna zajednica „Trg heroja“ -----	7 članova
Mjesna zajednica „Velešići“ -----	5 članova
Mjesna zajednica „Gornji Velešići“ -----	5 članova
Mjesna zajednica „Vraca“ -----	5 članova
Mjesna zajednica „Željeznička“ -----	5 članova

Član 4.

(Obavještenje o danu i mjestu izbora)

(1) Birači će se o danu i mjestu izbora obavijestiti putem internet stranice Općine Novo Sarajevo i putem oglasnih tabli mjesnih zajednica najkasnije 10 dana prije održavanja izbora.

(2) Obavijest treba da sadrži datum i vrijeme održavanja izbora, naznaku biračkog odbora, adresu biračkog mjesta i listu kandidata po utvrđenim teritorijalnim cjelinama za svaku mjesnu zajednicu.

Član 5.

(Kandidat)

(1) Kandidat može biti lice koje ispunjava sljedeće uslove:

- a) ima prijavljeno prebivalište na teritoriji mjesne zajednice i čije se ime nalazi na izvodu iz Centralnog biračkog spiska za datu mjesnu zajednicu na dan predavanja kandidature,
- b) koji dostavi najmanje 20 potpisa birača čije je ime upisano u Centralni birački spisak za datu mjesnu zajednicu na obrascu koji propiše Izborna komisija i
- c) koji dostavi ovjerenu izjavu o prihvatanju kandidature, na kojoj je vlastoručni potpis davaoca izjave ovjeren od nadležnog organa.

(2) Građanin jedne mjesne zajednice može dati podršku samo za onoliko kandidata koliko se bira u savjet mjesne zajednice na kojoj ima prebivalište.

(3) Kandidati ne mogu biti članovi izborne komisije i članovi biračkog odbora.

(4) Kandidatura se predaje izornoj komisiji, najkasnije 28 dana prije dana održavanja izbora za savjete mjesnih zajednica na obrascu koji propiše Izborna komisija, u zatvorenoj koverti sa prilogom iz stava (1) ovog člana, putem protokola Općine Novo Sarajevo.

(5) Prilikom predlaganja kandidata za članove Savjeta mjesnih zajednica treba voditi računa o ravnomjernoj zastupljenosti svakog naselja na području mjesne zajednice prema utvrđenim teritorijalnim cjelinama, kao i da prijedlozi kandidata odražavaju približno nacionalnu strukturu stanovništva mjesne zajednice.

Član 6.

(Ovjera kandidature)

(1) Izborna komisija dužna je najkasnije 18 dana prije dana održavanja izbora provjeriti kandidature iz člana 5. ovog Uputstva, na način da provjeri da li predloženi kandidat zadovoljava propisane uslove za kandidaturu.

(2) U slučaju da je građanin jedne mjesne zajednice podržao kandidaturu većeg broja kandidata od broja članova savjeta mjesnih zajednica, tada će se potpisi podrške prihvatiti za one kandidature koji su vremenski ranije dostavljene.

(3) Nakon što Izborna komisija utvrdi da kandidati ispunjavaju uslove za kandidaturu, izvršiti će ovjeru kandidatura.

(4) Spisak ovjerenih kandidatura Izborna komisija je dužna objaviti bez odlaganja na internet stranici i oglasnoj ploči Općine .

Član 7.

(Žrijebanje)

(1) Redoslijed kandidata na kandidatskoj listi utvrđuje se žrijebanjem koje provodi Izborna komisija.

(2) Nakon ovjere kandidatura iz člana 6. ovog Uputstva Izborna komisija, najkasnije 14 dana prije dana održavanja izbora, žrijebanjem utvrđuje redoslijed kandidata u cilju utvrđivanja redoslijeda kandidata na glasačkom listiću.

(3) Izborna komisija iz bubnja, za svaku mjesnu zajednicu, izvlači kuglice u kojima su na papirićima ispisani imena i prezimena svih kandidata čije su ovjerene kandidature za izbore za datu mjesnu zajednicu.

(4) Svi kandidati, se na glasačkom listiću redaju prema redoslijedu izvlačenja.

(5) Postupak žrijebanja je javan.

Član 8.

(Odustajanje od kandidature)

Ako kandidat, nakon izvršenog žrijebanja i izrade glasačkih listića, odustane od kandidature ili umre, njegovo ime se ne briše sa glasačkog listića već se o tome obavještavaju birači na dan održavanja izbora.

Član 9.

(Kandidatska lista)

(1) Na kandidatskoj listi se mora nalaziti najmanje dva puta više kandidata od broja koliko se bira članova za Savjete mjesnih zajednica.

(2) Izborna komisija za svaku mjesnu zajednicu izrađuje kandidatsku listu, na kojoj su kandidati poredani u skladu sa izvršenim žrijebanjem iz člana 7. ovog Uputstva, koju javno izlaže biračima na uvid na prostore za javno oglašavanje u svakoj mjesnoj zajednici, kao i na zvaničnoj internet stranici Općine Novo Sarajevo.

Član 10.

(Glasački listić)

(1) Glasajući listić sadrži:

- a) U gornjem lijevom uglu logo Općine Novo Sarajevo;
- b) U gornjem desnom uglu datum održavanja izbora;
- c) U srednjem gornjem dijelu naziv mjesne zajednice;
- d) Ispisani redni brojevi i imena i prezimena svih kandidata na glasačkom listiću u dvije kolone;
- e) U donjem dijelu u ovičenom prostoru uputstvo biračima o ispravnom načinu markiranja glasačkog listića;
- f) potpis predsjednika Biračkog odbora i pečat Općinske izborne komisije Novo Sarajevo.

(2) Glasajući listići se štampaju u A4 formatu i pakuju u kovertu, po 100 komada.

Član 11.

(Birački spisak)

(1) U Centralni birački spisak upisani su građani koji imaju biračko pravo i imaju prebivalište na području mjesne zajednice.

(2) Izborna komisija će blagovremeno od Centralne izborne komisije Bosne i Hercegovine obezbijediti izvod iz Centralnog biračkog spiska za svaku mjesnu zajednicu na području Općine Novo Sarajevo.

(3) Na kraju svakog Izvoda iz Centralnog biračkog spiska će se nalaziti prazna polja gdje će birački odbor upisivati podatke ukoliko se pojavi lice koje dokaže da ima adresu prebivališta u toj mjesnoj zajednici ali se ne nalazi na izvodu iz Centralnog biračkog spiska: ime prezime, JMB, spol birača, adresa prebivališta i broj identifikacionog dokumenta.

Član 12.

(Biračka mjesta)

Izborna komisija vodeći računa o principima utvrđenim Izbornim zakonom Bosne i Hercegovine, određuje broj i lokacije biračkih mjesta i objavljuje ih 10 dana prije izbora, na internet stranici Općine i oglasnim pločama mjesnih zajednica.

Član 13.

(Birački odbori)

(1) Birački odbor se sastoji od tri člana, od kojih je jedan predsjednik.

(2) Obavezni član biračkog odbora je sekretar mjesne zajednice i on obnaša funkciju predsjednika biračkog odbora. Ostali članovi biračkog odbora se imenuje iz reda državnih službenika, i namještenika zaposlenih u Općini Novo Sarajevo, te volontera angažovanih u Općini Novo Sarajevo, na osnovu internog oglasa oglašenog na oglasnoj ploči Općine Novo Sarajevo i putem elektronske prepiske. Izuzetno, ako članove biračkog odbora ne bude moguće imenovati iz reda državnih službenika i namještenika ili ukoliko sekretar mjesne zajednice nije imenovan ili nije u mogućnosti da obnaša funkciju predsjednika biračkog odbora, izborna komisija će imenovati članove – predsjednike biračkog odbora iz reda članova biračkih odbora imenovanih za opće izbore održane 2022. godine.

(3) Jedan član biračkog odbora je zadužen za kontrolu reda i kontrolu glasačke kutije, dok je drugi član biračkog odbora zadužen za identifikaciju birača i izdavanje glasačkih listića. Zaduženje članovima biračkog odbora određuje predsjednik biračkog odbora.

(4) Izborna komisija će imenovati predsjednike i članove biračkih odbora za sva biračka mjesta.

(5) Predsjednik i članovi biračkog odbora imaju pravo na naknadu za svoj rad. Visinu naknade određuje Izborna komisija.

Član 14.

(Obuka članova biračkog odbora)

(1) Predsjednik i članovi biračkog odbora su dužni prisustvovati obuci za rad na izborima za članove savjeta mjesnih zajednica. Ukoliko predsjednik ili član biračkog odbora ne prisustvuje obuci neće biti angažovani za rad, bit će razriješeni dužnosti i Izborna komisija će umjesto tog člana imenovati novog člana.

(2) Obuku članova biračkih odbora će organizovati Izborna komisija koja u tu svrhu može angažovati lice sa adekvatnim poznavanjem propisa za rad biračkog odbora, koje će izvršiti obuku biračkih odbora.

Član 15.

(Dostavljanje izbornog materijala)

(1) Izborna komisija je dužna biračkim odborima dostaviti izborni materijal najkasnije 12 sati prije otvaranja biračkog mjesta.

(2) Izborni materijal se sastoji od: jedne ili više koverti sa glasačkim listićima, Izvod iz Centralnog biračkog spiska, obrasci koje vodi birački odbor, jednu glasačku kutiju, dva ili više paravana za glasačke kabine, i kutiju sa neosjetljivim izbornim materijalom koji je potreban biračkom odboru u toku rada (kese za pakovanje izbornog materijala, plastični pečati, gumice, makaze i drugi neosjetljivi izborni materijal).

(3) U slučaju da izborni materijal nije dostavljen potpun i u ispravnom stanju, birački odbor o tome obavještava Izbornu komisiju koja je obavezna da otkloni sve uočene nedostatke odmah, a najkasnije do otvaranja biračkog mjesta.

(4) Predsjednik biračkog odbora je, od momenta preuzimanja cjelokupnog izbornog materijala od Izborne komisije do njegovog uručenja Izornoj komisiji nakon završenih svih aktivnosti, odgovoran za sigurnost Izbornog materijala.

(5) Izborni materijal će se skladištiti u prostorijama izborne komisije.

Član 16.

(Posmatrači)

(1) Proces glasanja i prebrojavanja glasačkih listića mogu posmatrati samo akreditirani posmatrači. Posmatrači mogu postavljati pitanja u vezi s izbornim procesom, ali se ne mogu miješati, niti smiju ometati izborni proces.

(2) Posmatrači mogu biti akreditovani u ime ovjerenog kandidata.

(3) Samo jedan posmatrač koji je predstavnik ovjerenog kandidata može biti prisutan na jednom biračkom mjestu.

(4) Posmatrač može biti osoba koja ima pravo glasa i koja ima prebivalište na teritoriji Općine Novo Sarajevo.

(5) Posmatrača akredituje izborna komisija, na osnovu zahtjeva podnesenog na propisanom obrascu.

Član 17.

(Izborni dan)

(1) Birački odbor je obavezan doći na biračko mjesto najkasnije jedan (1) sat prije otvaranja biračkog mjesta, kada trebaju pripremiti biračko mjesto kako će se koristiti na dan izbora, utvrditi broj imena na izvodu iz Centralnog biračkog spiska i utvrditi broj zaduženih glasačkih listića i te podatke upisuju u Zapisnik o radu biračkog odbora.

(2) Birač na biračkom mjestu dužan je da predoči članu biračkog odbora zaduženom za identifikaciju važeću ličnu kartu ili vozačku dozvolu ili pasoš BiH i nakon što se ime birača nađe na izvodu iz Centralnog biračkog spiska birač se potpisuje u rubriku za potpis pored svog imena.

(3) Član biračkog odbora zadužen za identifikaciju dužan je utvrditi da li izgled birača odgovara fotografiji na identifikacionom dokumentu i uporediti JMB birača na identifikacionom dokumentu sa JMB koji se nalazi na Izvodu iz Centralnog biračkog spiska.

(4) Nakon što birač dokaže svoj identitet i njegovo ime bude pronađeno u izvodu iz Centralnog biračkog spiska birač se potpisuje identično kao na identifikacionom dokumentu. Kada birač bude identificiran i potpiše se u izvod iz Centralnog biračkog spiska, član biračkog odbora proziva naglas njegovo ime, izdaje mu glasački listić, obavještava istog na koji način se vrši ispravno označivanje kandidata, koji je minimalan i maksimalan broj kandidata koji može biti označen kako bi glasački listić bio važeći i odmah ga upućuje prema glasačkoj kabini.

(5) Ukoliko se ime birača ne nalazi na izvodu iz Centralnog biračkog spiska, a birač predoči uz identifikacioni dokument iz stava (2) ovog člana i potvrdu o prijavi prebivališta, ne stariju od 10 dana, kojom potvrđuje da je prijavio prebivalište na nekoj od adresa u mjesnoj zajednici, član biračkog odbora zadužen za identifikaciju će na zadnjoj stranici izvoda upisati ime prezime birača, JMB, adresa prebivališta i broj identifikacionog dokumenta, te će se birač potpisati u rubriku za potpis pored upisanog svog imena.

(6) Birač na glasačkom listiću može označiti najmanje jednog, a najviše pet ili sedam kandidata, u zavisnosti koliko se članova savjeta mjesnih zajednica bira. Kockica ispred kandidata može se označiti stavljanjem određenih znakova ili zaokruživanjem istog.

(7) Birač svoj glasački listić označava u glasačkoj kabini, nakon čega isti presavijen ubacuje u glasačku kutiju.

Član 18.

(Zatvaranje biračkog mjesta i brojanje glasačkih listića)

(1) Birački odbor u 19:00 sati zatvara biračko mjesto. Biračima koji se zateknu u 19:00 sati ispred biračkog mjesta bit će omogućeno da glasaju i kad zadnji birač glasa birački odbor zatvara biračko mjesto.

(2) Nakon zatvaranja biračkog mjesta birački odbor utvrđuje broj potpisa na izvodu iz Centralnog biračkog spiska kao, broj neiskorištenih glasačkih listića, kao i broj oštećenih glasačkih listića i te podatke upisuju u Zapisnik o radu biračkog odbora.

(3) Birački odbor otvara glasačku kutiju i sve glasačke listiće iz glasačke kutiju istresa na radnu površinu, utvrđuje broj glasačkih listića u glasačkoj kutiji, te broj upisuje u Obrazac za zbirne rezultate. Nakon toga birački odbor pregleda svaki listić pojedinačno i utvrđuje važeće, nevažeće i oštećene listiće i odvaja ih na zasebne skupine.

(4) Glasački listić je važeći ukoliko je birač zaokružio maksimalan ili manji broj kandidata na glasačkom listiću.

(5) Glasački listić je nevažeći ukoliko je prazan, potpisan, birač zaokružio veći broj kandidata od maksimalno dozvoljenog broja.

(6) Kod odlučivanja da li je listić važeći ili nevažeći predsjednik biračkog odbora je dužan predočiti listić drugim članovima biračkog odbora, a konačna odluka se donosi većinom glasova članova biračkog odbora.

(7) Birački odbor potom sortira važeće glasačke listiće u snopove po 25 komada (duplim brojanjem dva člana biračkog odbora), koji se unakrsno postavljaju na radnu površinu. Zadnji snop može ali i ne mora imati 25 glasačkih listića. Na zadnjem snopu stoji žuti stiker na kome je upisano koliko glasačkih listića ima u tom snopu, ukoliko ih ima manje od 25. Predsjednik biračkog odbora prebroji snopove i množenjem sa 25 dobije broj važećih listića koji upisuje u Obrazac za zbirne rezultate.

(8) Predsjednik biračkog odbora uzima jedan snop važećih glasačkih listića od 25 okreće ih prema sebi i iščitava obilježene kandidate ispred kojih je birač označio svoj izbor. Drugi član

biračkog odbora uzima pomoćni obrazac i u kolonu pored imena koji je čuo od čitača upisuje jednu uspravnu liniju. Nakon završenog prvog kruga brojanja, čitač i član biračkog odbora koji je bilježio glasove na pomoćnom obrascu zamjenjuju uloge i vrši se još jedno kontrolno čitanje i upisivanje na drugi pomoćni obrazac. Ukoliko se za pojedine kandidate ne slažu brojke sa dva pomoćna obrasca, tada se radi ponovno iščitavanje i evidentiranje glasova za te kandidate kod kojih je utvrđeno neslaganje. Član biračkog odbora potom za svakog kandidata sa pomoćnog obrasca iščitava ukupan broj dobijenih glasova predsjedniku. Predsjednik taj broj upisuje u Obrazac za zbirne rezultate za svakog kandidata pod rednim brojem koji je utvrdio član biračkog odbora koji je popunjavao pomoćni obrazac.

(9) Glasački listić na kojem birač nije zaokružio redni broj ni jednog kandidata kao i glasački listić gdje je birač zaokružio više od 5 ili 7 kandidata birački odbor odlaže na stranu i nakon završenog brojanja po kandidatima prebrojava nevažeće glasačke listiće i broj evidentira u Obrazac za zbirne rezultate.

(10) Sve obrasce dužni su potpisati predsjednik i članovi biračkog odbora.

Član 19.

(Pakovanje izbornog materijala)

(1) Birački odbor kovertu sa neiskorištenim glasačkim listićima i izvod iz Centralnog biračkog spiska pakuje u plastičnu vreću koju zatvara plastičnim pečatom.

(2) Birački odbor prebrojane važeće i nevažeće glasačke listiće pakuje u plastičnu vreću koju zatvara plastičnim pečatom.

(3) Obrazac za zbirne rezultate birački odbor pakuje u kovertu na kojoj treba upisati naziv mjesne zajednice.

(4) Preostali izborni materijal birački odbor stavlja u glasačku kutiju.

(5) Birački odbor je obavezan odmah po završenim svim aktivnostima, a najkasnije do 24:00 sata, predati izornoj komisiji zapakovan izborni materijal.

Član 20.

(Dostavljanje Izvještaja)

Izborna komisija je dužna u roku od 15 dana od dana održavanja izbora, dostaviti Općinskom vijeću Novo Sarajevo Izvještaj o rezultatima provedenih izbora sa listom svih kandidata, koji su učestvovali na izborima, sa brojem osvojenih glasova po mjesnim zajednicama.

Član 21.

(Obrasci)

Sastavni dio ovog Uputstva su:

- a) Prijavni obrazac kandidata,
- b) Obrazac izjave o prihvatanju kandidature,
- c) Prijavni obrazac za članove biračkih odbora i
- d) Prijavni obrazac za akreditaciju posmatrača.

Član 22.

(Objavljivanje i stupanje na snagu)

Ovo Uputstvo stupa na snagu danom donošenja i objavljuje se na internet stranici i oglasnoj ploči Općine Novo Sarajevo.

Broj: 02OV-01-1-6659/23

Sarajevo, 05.10.2023. godine

za predsjednika Općinske
izborne komisije

Srđan Lazar, član